



記
言
別集
八十九

丘墓

共三十一

~ 16
2346
19



門一和
號 2346
卷 21-19

記言別集卷之二十二

立墓文

四寒先生碣

公諱昌一字亨吉別號四寒姓金氏系出新羅
高麗時有太子太師仁瑄太師生殿中內給事
則麗給事四世有通禮門副使瑀副使生都觀
察使子粒觀察使生小尹根於公為五世祖大
父良浚延恩殿叅奉父濂雲山郡守母尚州金
氏公才識卓然少從學楊庵金謹恭先生能力
學讀書有能詩聲累選禮曹試取以少藝成名



不應覆試從遊一時名儒成大谷閔幸村崔守
愚先生公師事崔先生崔先生以友許之常樂
稱公潔行高節 宣祖召用儒學累拜齋郎皆
不就及己丑獄起良善多連死南溪之死禍急
親戚亦莫顧也公哭之甚哀解衣以殮曰禍福
命也崔先生亦為時宰所鍛鍊卒瘦死獄中公
以書請一言教弟子者先生臨絕無他語書紙
一正字而已亦不成字聞者流涕壬辰之亂奔
竄山中有少年食公之馬曰吾聞主公仁人也
能急人不愛千金必不以一馬害人也公果不

問也乙未春拜掌苑別提夏改王府都事公乃
就職尋謝歸公從宦三十年或出或不出為郡
縣七嘗以東宮副率陞衛率為洪川縣監以翊
贊為高山縣監以司禦為高敞縣監以治理陞
金溝縣令皆有政清碑以市令為安岳郡守入
為軍器寺僉正庚戌為陝川郡守贊成仁弘陝
人方執國命用事人多畏事之公以故舊揖之
無一卑顏色以奉之其門下客多毀之者癸丑
光海殺永昌前弼善鄭蘊上疏諫當論死公慨
然欲一言悟上意以為無益且益禍乃止繼而

有海獄起崔海州沂闔門皆保死初沂就命公與訣以公與負罪者親善陰有謀幾不免竟坐黜戊午太妃廢李相國恒福以諫竄北邊公往見之不言窮危相與戲劇而去癸亥仁祖既反正召拜清道郡守連帥滄素驍悍立威力驅郡縣巡至郡公不受談笑而折之卽棄歸按使以事聞滄罷公似不起丁卯之亂上出壺江都公以老不從歸原州州士大夫謀舉兵勤正無所屬相謂曰金公長者賢而好大節禮接士大夫人望所屬遂推以爲將時公八十賊退

特拜匠作監僉正不就庚午以大年累陞同中樞上䟽陳王政大本明年十月公卒年八十四歸葬原州之獐山貞夫人康氏同原公好恢廓峻潔方嚴推誠與人忠而有禮篤於恩愛有兵兄積疾死公爲之竭力醫藥百方未嘗惰容至刺臂瀝血以救之雖孝子之事親亦莫過也父母之喪衣衰麻食粥居廬三年而返以田宅減獲均諸兄弟亦躬自薄而加厚於二妹之貧無資者當兵革之世親戚之飢寒顛連仰而資衣食者亦十數常居視兄弟之子猶子其事之也

亦如子之事父也公既年益高而德益邵教成於家一門之內懽愛克順公歿于孫已三世四世猶有餘教可觀今州西三十里寬川有翠屏山水舊業公有三男二女長男頴宣務郎持母憂不勝喪而死次男頴義禁都事小男頴亦早歿婿二人進士李庭翼士人閻樞內外子孫至曾玄之世六十餘人其銘曰
碩人懿懿不隕不獲坦而蕩蕩夷而噩噩危而不閱不見知而不悔君子之貞君子之介可以教後人可以警百代

贈吏曹叅判李公墓碑銘

公諱道長字泰始姓李氏其先廣陵人高麗聞人判典校寺事集之後也典校之後有刑曹右叅議之直禮曹叅判禮孫左通禮克堅承仕郎摯國子進士德符德符生遵慶遵慶生熙復熙復生工曹叅議潤兩於公為皇考母仁川蔡氏成均生貧應麟之女也萬曆三十年五月十一日公生有從祖祖父僉正光復生主簿榮兩之嗣以公為後公童非時誦學記大學中庸事鄭先生於泗上始知名二十八擢大科補承文

權知四年出為沙斤察訪能革弊修舊一年謝
歸其人至刻石不忘云其年以博士為注書時
叅議公歿既三年復為注書冬虜大舉攻我先
騎三日已過開京 上急出幸江都公見體相
塗曰事迫矣不急出兵以截奴輕動 至尊猝
然有變相國為之奈何相國初不甚然之俄覺
之即發四哨兵出則奴已薄矣 上急馳入南
漢 廟社妃嬪諸姬王子貴臣家皆已入江都
矣大臣多勸 上夜急馳出不日江都可至也
言未決城中擾亂公進曰事變不可知為此計

者過也決為城守計明誓戒以安城中 上從
之然後乃定奴圍城日急 上令自公卿大臣
下至衛士卒伍各言其所欲言者公在 上前
善於記事 上屬視之在列者皆相顧嘖嘖曰
能明年冬改藝文檢閱累轉至奉教 上甚信
任之夏拜司憲持平自此連在三司冬以校理
遷吏曹佐郎時藩中有召兵之事南士有一人
媚時議者言出兵無大害於義者大臣納其言
且將擢用其人公以義力沮之已卯選知製
教拜修撰乞養出陝川郡守一年小民樂業奸

猶屏息郡稱治未久患風痺病家居連以侍從
召不起上疏進時務後為應教司諫皆不起甲
申十一月十八日公歿年四十二訃聞 特賜
賻儀明年正月六日葬于星州茶村東向之原
公居星州六世先葬皆在星州後二十一年甲
辰以長男貴追爵吏曹參判公有通識敏才又
能博學而賢於藝論事識微多人之所不及者
列其居家善行善於父母昆弟篤於喪祭教家
必以忠愛親親慈本處義確臨財廉見不善若
免已娶安東金氏判中樞時讓之女也生四男

四女男元禎兵曹參判次元祿長淵府使次元
禮早歿次元祉婿四人別檢張鉢士人權斗望
郭鐫朴明燮元禎三男聯命學錄漢命生負龜
命幼四女二婿柳命河崔恒齊二女幼元祿長
婿鄭震僑三男周命基命申命二女幼元禮一
男婿趙宇衡元祉一男顯命張鉢六男萬紀進
士萬重萬最萬用萬益萬成四女其二婿安重
鉉進士洪相文二女幼權斗望三男碩亨德亨
后亨三女二婿朴文老金聖佐典籍一女幼朴
明徵一女幼銘曰

謇謇之忠匪躬之節卒不大施中道而折嗚呼
命也

韓興君墓誌

公諱德演字潤伯姓李氏本韓州人文靖公穉
八九世孫也文靖公四世有叅贊墳 成宗二
年策佐理切臣封韓城君韓城君生左議政惟
清左議政三世有 贈領議政澳宗家之祀為
後於堂叔父別提潘於公為皇考妣 贈貞敬
夫人驪陽閔氏肅川都護府使元宗之女嘉靖
三十四年十二月丙申公生議政公三子公最

長而少子德洞中興世為左贊成公在 宣祖
世累舉不第四十五以門蔭為典設別提歷長
興庫主簿司憲府監察壬寅為定山縣監後連
為陽城鎮川二縣丙午議政公歿既三年為世
子翊衛辛亥為金城縣令四年以治理陞古阜
郡守增修學舍捐邑俸以資供給郡中子弟居
業者甚盛居一年贊成公由中書出按湖南公
移沔川郡守郡以適易凋弊公節約自薄畜積
歲增治兵政修器械數年邑以完以賞典陞通
政及沔父老借留一年辛酉為文化都護府

使時嬖倖益恣朝政大亂公恥之居一年辭歸
移鐵原數日公咄咄曰白首而尚為使乎即棄
官歸公有西湖別業曰二水亭公漁釣自娛
仁祖克大難之三年乙丑會盟新舊功臣公例
陞從二品拜同中樞襲封韓興君時公已七十
不改江湖之樂十年以大耄陞正二品位齊列
卿丙子三月廿三日卒壽八十二 上賜祭如
儀五月丁未以禮葬于畿山南向之原公簡重
寡言不喜紛華任濁世以卑事權貴為恥居外
府雖歲時問遺不過循例滿儀而已嚴於關節

持一扣法不撓其祭祀之節居家之法皆足為
士大夫矜式歷典八邑未嘗營立產業座右書
安分守靜四字以自省韓夫人太師蘭之後而
典籤景福之女也夫人生於嘉靖三十二年五
月歿於萬曆十年正月善事舅姑為家有賢婦
人儀則有一男二女男性源司憲府持平婿二
人主簿金命夔直長尹瑛性源生齊沆景沆齊
沆內侍教官景沆司饗院奉事女一人適士人
吳道原內外子孫二十餘人衣冠者八人登臺
省者一人觀察使一人節度使一人又庶出子

女五人男仁源婿金晉灝李淳鄭元輔柳承業
皆有子女共二十四人銘曰
子孫之承承吉人之昌子孫之振振吉人之祥
崇四尺之封吉人之藏

贈贊成李公墓表

先古有李謂平者新羅初以諸部大人得姓始
大其子孫多顯者至高麗有尚書左僕射景咨
封食邑江陽之地其世遂為江陽人及我 恭
僖世有節度使允儉其子希曾為弘文館修撰
其後連二世不達至公公諱胤緒字善承慨然

有自立之志學讀書為舉子業東方大亂國家
設武科多取奇才武藝公即棄其業執弓矢一
射而決然不甚知名困於列士我 昭敬王三
卜三年有薦之者初授宣傳官以母憂去後五
年復為之四年為清河縣監有治理效 上賜
表裏以償之萬曆末遼左陷敗我邊境多事北
邊為置防戍於城津公為僉節制使以能陞折
衝將軍遷咸興別將又有功能增秩從二品移
守龜城時明將毛文龍鎮龍川其將卒折辱我
守長多無狀及見公叩頭拜曰公大人相戒飭

更不侵擾入府境聞黑漢追都督兵猝至或言
避兵計公曰寇至而去惡在其為將也終不動
及莽百姓借留一年明年入為衛將我 仁祖
元年李适為副元帥出鎮寧邊知公賢可任屬
薦於 上以為中軍公見适驕橫多不遜心憂
之明年春适果舉兵叛公私謂哨官王有榮曰
若以所領兵赴元帥府見諸將傳我書道我言
當以死報 駁下私遣其妾與二女子與別將
柳舜懋謀即帳中斬适持劍欲起者數不得其
當适長驅至順川公謂舜懋曰鬱鬱計無所遂

吾死晚矣欲潰軍直出至元帥府先自殺以示
諸將士無恨也遂與之決約以蠟書先報元帥
至慈山夜與柳舜懋李慎李玘等發砲應之四
營一時擾亂散歸公即馳出士卒從者三千人
見元帥慷慨言曰我為將在賊中既不能斬賊
使賊長驅吾何面目立於世也屬其奴歸告其
家人曰吾乃今日決死以此告先人之廟遂自
刎死之一軍賢之皆涕泣事聞 上曰烈丈夫
之志也追爵刑曹判書 賜祭以褒其忠錄其
功原從之首加 贈右贊成公長大有風儀善

容人人不見其喜怒臨大亂能不變其心殺身以見其節義於乎韙矣貞敬夫人全氏籍全州故察訪兩之女無子以族子亨源爲後有妾出子女二人子曰巨源八溪郡北吳世鄉有忠臣塚鄉人謂之李龜城墓云余嘗讀新羅忠義傳善德中有百濟之師大野城主品釋窮迫約降竹竹曰百濟無信之國不如力鬪而死品釋不聽先出其士卒果有伏甲狙擊甚急品釋自刎死竹竹曰父名我曰竹竹此教我也寧死無辱拒守益堅城陷死之國人賢之至今名其鄉曰

竹竹又斯人者方李适舉兵叛以四軍召諸將約束夜令諸營兵皆潰亂身以三千騎馳出見元帥自言不斬賊無面目報一殿下自殺死之何其烈也其後十有餘年南漢之敗有鄭文簡公事皆傍邑人地之相近且六十五十里云

李持平墓銘

公諱性源字復初姓李氏其先本韓山郡人高麗門下侍中穡之十世孫我成宗功臣韓城君墳之曾孫韓興君德演之子左贊成德洞之從子也母上黨韓氏典籤某之女皇明萬曆四

年四月乙亥公生生六年韓夫人歿外祖母崔氏甚憐之每食必涕泣勸之食肉其悲哀不能下咽見者泣之及就學必求前言徃行自砥礪樂從先生長者遊季父贊成公賢之曰吾家有仁人光海二年陞上庠十二年選大科三年仁祖既反正再試一榜士公初欲不應以父命赴試成乙科第一人及第選入槐院轉至博上兼太常後以騎省佐郎出為高山道察訪時北路為官者多忒人不率法擇遣人望而實斥之也韓興君年高既逐離因感夢自驚即馳行至則

果有疾一家大驚皆曰孝子之感也上疏言不得遠離狀上感而許之復入騎省自此連在丙司丙寅有別試取士在選者多考官親屬子弟公以持平力論之盡罷一榜丁卯由侍講文學為畿省都事明年復為持平見世變日多不樂於朝力求補外用事者縱不悅憚其名不遽出之縣邑也韓興君遘疾彌留公日侍疾色不惰食不飫羸瘠積疾數年疾益劇嘆曰不肖誠不能感鬼神然命也吾不忍親老而見死子教子弟移館舍二日而公歿天啓九年五月五日

年五十四某月甲子葬高陽之巖山某向之原
韓興君既壽考公且衰而能服勤不怠保養如
嬰兒以早失先夫人有長姊已老事之如事母
凡親戚有喪其居處服食一循禮節好恬靜於
勢利尤泊如也善與人忠愛不置表襮任職必
謹慎臨下必先教而後罰當言事臨利害不激
不變確然難動搖鄭公經世稱之曰出羣之標
平正之論於今之世吾見李持平一人云淑人
全州崔氏別提某之女治家有法教子孫必以
安貧守分為率蓋亦婦人之賢者也淑人長於

公二年寡居十六年七十一歿崇禎十七年二
月八日祔葬巖山生二男一女長男齊沆以內
侍學教官早世次男景沆免山縣監女適士人
吳道原齊沆生五男澐浣洵泓澔早歿無子
景沆生三男一女男澐灌漢女適士人洪萬源
澐早歿有二男一女幼銘曰
忠敬篤愛直而不激孝弟之積也

李上舍碣銘

太學上舍李命哲汝迪故王府都事別號杏村
公之仲子也杏村公有四子曰命勗曰命哲曰

命式曰命變也皆秀而藝西湖李承旨嘗私嘆
曰有是父當有是子上舍溫厚有至性事父母
家貧耕釣以養其為家內外異事男女有職至
於僕隸亦皆有序昆弟之間懽愛翕如也有太
守聞其賢徃月之上舍披策釣於江上太守心
敬之禮貌而去嘗為親應舉己卯陞上舍後累
屈於大科嘆曰以祿養不如以志養不復求舉
力作以承父母懽心嘗於江都之敗上舍容於
湖右賊中入海島求父母所在有正兄之妻若
子皆死既涉海以屍歸葬母奇氏積疾彌留心

憂苦三年莫不曰孝子之行也甲申家大疫其
兄死而先府君又歿上舍病且劇矣勺水不入
口八日死上舍生於萬曆乙巳死於崇禎甲申
年四十卜葬不吉凡三遷而定於坡山山下金
谷族墓上舍我世宗四世孫錦川君城之曾
孫而司憲府執義贈吏曹叅判敬中之孫也
皇考杏村公諱幼淳隱德不售篤行踐實上舍之
學蓋出於家庭云好讀聖人賢人書得於大易
者尤多而傍通天文地理醫藥卜筮之數惜哉
上舍博學高行不見知於世而卒早歿而無祿

天之於善人何如也妻權氏秉節校尉侑之女
有男二人震曼震錫震曼生泰齡震錫生恒齡
其銘曰

敦且仁潔而貧沒而湮

完川君碣

完川君李公諱純信字立夫 太宗長王子讓
寧大君提三世有榆梯令允義允義生國子生
貞貴達貴達生真真生公母福州金氏國子進
士龜壽之女也公少業儒不成習騎射二十五
擢謁聖乙科及第 上親臨唱榜公精勁剛勇

上屬視之不已侍列者竊知 上心得士矣叅
下再為宣傳官仍選為籌司郎出為康津縣監
三年以薦為穩城都護判官初不甚知名金公
誠一一見知其賢能准薦之甚力六鎮歲饗藩
胡胡人飲醉多使酒擾亂每饗飲未半輒驅遣
之公曰此不以誠信待夷也必令飲醉乃遣胡
人悅服皆頓首謝戊子為義州牧判官有奉使
者過州其需索多無厭公心不可所辦給路資
而已餘外皆不聽而去及使還故以佗事必欲
釋憾乃已公即解印綬歸而猶啓罷之時胡人

數寇雲龍北邊騷然以公特叙為惠山鎮僉節制使以禦胡公受命即行至鎮胡又寇雲龍急公即馳赴之至則胡已去矣主將以為賊來不救公與諸邊將元熹李億祺當坐法無赦上惜壯士以熹億祺赦死充軍公特釋之罷官而已前時奉使者方為金吾論以同律皆充軍北邊上特寬之皆移海陽善地俸人方搆釁我百端上憂之命擇將以備倭公特又叙為防蹠鎮僉節制使公治軍旅繕城池修器械以為戰守備後年壬辰平行長大舉入寇元均沉

船退遁求救於湖南水軍其節度使李舜臣出舟師救之公為中衛將自玉浦過固城前洋三戰三勝之又聞賊急以公領前部先行至泗川賊據險阻列戰艦以為形勢我師佯退以誘之賊果追我急公為殿與大軍夾擊大破之進至唐浦賊勢甚張又急擊勝之悉燒其船進攻唐項賊舟師四面圍之而合擊大破之又邀其歸路公獨以所部兵擊殺數十百人斬其將軍勢益壯自此公常在前部休士卒又進至見乃梁遇賊地勢不利引至開山又擊破之至安骨浦

賊依岸水淺我師誘之而終不出遂進兵薄圍
殺傷甚衆賊窮蹙棄船上陸焚其死傷積尸者
十二處我悉燒其船相守以待後月賊引去而
召諸路倭會於釜山時李節度以大兵躡其後
公帥前部遇賊於苑遵多大西平絕影連勝之
至釜山又擊破其前鋒大軍繼之戰益力賊大
挫不敢動斂兵無西意實我舟師連勝拒塞之
力也每上功公功最多而不悅者沮之賞不
及公李節度特條上公功勞曰純信戮力攻戰
專師伐賊者四而每勝不以斬馘爲功唐項之

役斬將陷陣功最高諸將惟此人能以死勤事
者也今行賞而獨不及純信此有戰之功無戰
之賞 上特進階折衝拜湖西水軍節度使公
行鎮首論大官違節制者反以公軍法過制帝
職尋以私怨被誣告就理 上知無事釋之然
左遷爲高嶺鎮僉節制使一年籌司薦之爲留
都防護大將帥舟師駐西湖以衛京城俄拜甄
城尹改湖南節度使大臣以爲防護事重啓留
之其年賊又大入寇元均失軍逃遁爲賊所殺
李節度爲統制使公又爲水軍節度使賊至興

陽公擊破之進嘉善時平行長據順天海上築
壘堅守劉摠兵戰不利又進兵攻之我師與陳
都督連兵扼海口逼之行長召沈安頓吾以大
兵乘夜襲我師我已有備中衛兵先得五賊船
燒之諸軍大起合擊勇氣自倍士無不一當百
追至南海前洋大破之行長棄城遁去諸賊悉
退而統制死於軍中公以中衛將督諸軍仍擊
逐之振旅而還捷書聞公進嘉義及封功賞公
不與焉 上令改更之至責問然後乃始列之
三等賜效忠仗義宣武功臣號進資憲封完川

君推恩三世曾大父為榆梯都正大父為戶部
叅判父為左贊成完原君初既平賊以水軍節
度使為五衛將行訓練都正同知中樞湖南水
軍節度使水原都護府使京畿湖南防禦使西
海湖西南嶺南咸鏡南道節度使既封君益資
為知訓練訓練大將五領行夜六典禁兵至都
摠管光海初立有臨海獄武臣多連累公亦連
繫既置對得釋官封仍舊後三年以湖南節度
使九月卒於營年五十八訃聞 上為之罷朝
巷市賜吊賻如儀以禮歸葬衿川南日直 仁

祖時用勲例追 贈左贊成至 孝廟時以長
男珙振武原從加 贈右議政完川府院君今
上五年太常議謚曰武毅謚法折衝禦侮曰武
致果殺敵曰毅公爲將在邊禦衆簡而賞罰必
信臨下以恕至臺輿下卒必與之分食飲能得
人之死力抗直不肯卑事人見人違法行私無
一假借不拘權貴當路者多不悅惟知遇 宣
祖自初發身揀拔寵擢以至封君富貴皆 上
用之也故忘身徇國思以竭忠報 上李統制
稱其盡瘁勞功許以死事者也貞敬夫人坡平

尹氏慶尚道兵馬虞候天壽之女也有至性姑
夫人年高奉養必先意順適以承歡心姑夫人
常言曰吾婦事我至誠無以報但願享壽福如
我而已夫人累封至貞敬夫人二男皆貴至封
君子孫滿左右七十八卒祔葬同原二男珙珉
珉李适叛時以諸將在軍中旣不斬賊則與李
胤緒柳舜懋李慎各以其所領兵夜潰陣擾亂
散歸者三千 上義之特列振武原從之首襲
封完興君無子珙亦襲爵封完山君珙生光輔
郡守婿三人護軍南斗明縣監柳璘都事李廷

觀光輔仁錫龜德龜元龜益龜德龜益龜進士
婿三人佐郎李尚翼縣監金廷士人朴繕南斗
明生壽星弼星景星相星井星壽星府使玄適
承旨李哲柳璘生壽昌泰昌時昌宣昌壽昌縣
監李廷觀生志行縣監公有側室一女爲判書
南以恭長妾其銘曰
躬盡瘁矢死事忘身循國威敵克壯三軍之望
也仗忠信明賞罰功成不矜戰勝不伐戎臣之
烈也強而理任干城勒功彝鼎垂耀汗青百代
之名也

李德山墓銘

公諱昌源字吉甫姓李氏其先本韓城人高麗
門下侍中穡之後我中宗相惟清之六世孫
而左贊成德河之長子參判申湛之外孫也公
旣家世貴大絕無侈縱慢易氣天稟淳懿克孝
事繼母至誠篤於親戚交友有叔母年老違癘
痠死公躬執殮哭之如哭母有鄰丈老許璉死
貧不能殮公捐財力以救之吊者皆曰善哉古
之遺義也公二十六初筮仕歷活人別提義盈
直長主簿義禁都事翊衛司禦領邑九果川陽

德泰川安峽知禮禮山陽城德山唐津德山有
去思碑先相公戒之曰守職必謹臨民必恕公
以故居官謹飭以德惠為先每以官為家歸則
無甌石之儲妻子常苦貧喜儒術樂與姜子久
遊精於五行之運推陰陽消長占人吉凶脩短
無不驗好閑暇鼓琴以自娛六十七歿其生皇
明萬曆戊子十一月十六日其歿清主順治甲
午十一月五日其葬明年正月廿八日而漣川
南禾津洞西向之壠也初娶府使宋象賢之女
無子後娶縣監元宗植女生二男二女先慶長

慶先慶進士女婿二人郡守姜頊進士姜文粹
姜頊生頊賓頊臣頊賓正字頊臣進士元淑人
有婦德公歿之三年八月廿一日歿而合葬焉
銘曰
不辱不忝淡而能儉

綾昌大君碑

綾昌大君諱佺 宣祖親王孫而 元宗第三
子 仁祖弟也十五初受封為綾昌君生有美
質惠信慈純篤於孝友恭敬儉約不以貴大加
人好讀書折節為行稱賢公子光海猜忌骨肉

自初立為君諸王子論以叛逆死者如臨海永昌皆處之絕島陰使人殺之閉太后於西宮公子又被上變囚之海島高林陰令守者食置毒迫之令死諱殺骨肉名也公子知不免乃更衣北向仰藥自殺私為書以訣父母獄事嚴雖親戚不相通得書然後知訣死在某日云國人憐之為之謠曰海之沅沙渺彌年年春漠漠草萋萋王孫一去不復歸家畏法不敢備禮葬于國東郊之外於是國大亂人心內叛至癸亥仁祖 義克大難 太后復位而光海廢追尊

禰廟公子以國制追封大君謚曰孝愍用王子禮改葬古廣州治西 孝宗以 上弟麟坪大君湑為後令祭祀不絕也公子生於萬曆三十一年七月十六日歿於其四十七年十一月二十五日為十七有遺一女外婦出也婿寧越郡守許舒大君四男二女福寧君栢福昌君楨福善君栢福平君楹二婿趙祺壽鄭重萬重萬進上許舒四男二女狷狷翺翺武科虞候翺 恭陵叅奉二婿沈根趙泰胤福寧君早世有男受封者二人陽原君煥義原君焮其婿金錫達沈

佐漢崔賢齊二女未歸福昌君一婿沈仲良福
平君側室有二男二女四人幼其銘曰

雪幽寬感神祇百代之教萬國之治天道孔昭
吉祥綏之嗚呼九原幽昧其有知耶其無知耶

李持平墓碣銘

公諱禔字子完姓李氏其先延安人高麗太子
詹事襲洪之後也六世有都觀察使貴山又四
世有兵曹叅議仁文叅議生三陟府使球府使
生礪山郡守慶宗郡守生司諫院正言澍正言
生觀察使昌庭於公為皇考以名節重於時當

光海政亂不甚顯用 仁祖世擢拜咸鏡道觀

察使卒妣貞夫人星山李氏夫人父應明隱德
不見公莊重少言語篤厚嗜學以文學為一時
所推重二十二觀察公卒後八年貞夫人卒既
早失考妣哭泣之哀居喪之節多動人者由是
名益顯 仁祖十三年為增廣生貢明年以薦
為東宮洗馬不就後四年己卯別試丙科及第
選為槐院正字當大亂之後又天大旱 上罪
已求言公乃上疏言變通振作之宜凡七條累
百言辛巳陞博士兼太常明年以成均典籍轉

禮曹兵曹佐郎出為沃溝縣監海濱斥鹵曰作
不饒鬻魚鹽為利民食苦貧而侵暴無已漁戶
散亡公私大空公為政務寬約悉除無名之稅
捐邑俸以贍民選子弟勸以學藝數年流逋還
集邑稱治丁亥復入禮曹兵曹為正郎移司諫
院正言洪茂績李應著姜嶽時以直言竄北邊
公上疏言兩臣及昭顯三兒事仍及治道一本
於君德君心之正後以直講改司憲府持平兼
史局糾正邪枉持法無私人心肅然畏憚有古
執法風其年大飢 上命大臣設局勾管賑飢

事選擇任之公以執法兼任郎署事事體不可
辭不許大臣且言才難非此人無人 上特令
出入揖不拜裁度可否事一與大臣抗禮蓋曰
事所未有也 上素重之公嘗侍 上退食
上目之曰不恥惡衣惡食唯此人戊子再為持
平時金自點為上相指災異為適然勸 上大
興作群臣皆反目無敢言者公上疏乞辭仍極
言災異讒諂奢縱賄賂紊亂怨讟且累百言秋
復為持平疾病 上賜太醫藥物寵待之特厚
卒不救年四十五 上命有司特舉恤典加等

令恤其家自公卿大夫士知與不知以至僮與
下賤皆歎惜以為賢執法正矣多泣下者自先
觀察公家不言而躬行公方正儉約善於父母
昆弟居無私貨薦於忠愛好讀書尤致力於經
術其學自居家孝悌至於事君善俗一以修身
謹行為本既所植者確所履者正有高人之行
而當世道大壞特立不阿以媚俗苟容為恥嗟
乎賢而無命以有為之才有為之志卒不大施
而歿則天也趙龍洲綱作哀悼文曰堅確之操
萬牛不能回其重直前之勇三軍不能奪之氣

此子之得於天者也天胡嗇子之壽而闕子之
道於此世之施也公樂居巖川湖南武城縣有
鏡巖川上庄公既歿過者指言李栢府別業云
淑人鐵城李氏高麗尚書嶠之後而正郎元樛
之女也雅謹克勤婦職事姑夫人無不順適姑
夫人稱之曰賢婦必受成福淑人少於公一歲
寡居二十年六十四歿諸子幼孤能讀書修行
不墜家訓實淑人教之也有五男三女男龜徵
文徵休徵鳳徵麟徵婿李昌胃宋世奎洪萬玉
又有庶出子悠徵子孫三世二十餘人其成人

嫁娶者文徵子渲演宏婿李基夏休徵子滢李
昌曹婿洪基尹宗慶初公歿葬於唐津以筮宅
不利淑人歿合葬於沔川崇學山下已向之原
其墓銘曰

秉正無夸廉義自克貞白不囿古之遺直

永膺李先生墓銘 戊申

先生諱至男字端禮姓李氏本延安人高麗太
子詹事襲洪之後也高祖仁忠以清白選仕至
承政院承旨曾祖弼 贈吏曹參議祖繼長以
經學發聞初筮仕為南部參奉父彥忱司憲府

掌令坐論事補外連乙巳事謫舒川歿廣陵
安氏弘文館博士漢英之女也有節行傳嘉靖
八年我 恭僖二十四年十一月十二日先生
生六歲讀小學自知力行一門謂之孝兒十
五六已有志古人之學鄭承旨源以女妻之先
府君淳昌時先生從之執贄見金河西先生金
先生作字說又有勸學詩後從履素齋先生學
益通丁未先府君歿於舒川以喪歸在道路晝
夜不離櫬號哭不絕聲時沍寒凍雪盈衣當時
禍機甚急雖親戚亦畏忌莫顧也先生苦身竭

方至親負土石以營塚曠乃廬於墓下朝夕上
塚悲號莎草為枯鄉里為之嘆息泣下以為孝
子之至行也三年之外每有忌辰必食蔬食飲
水不與人坐以為終身之喪母安夫人自孀孀
悲痛積疾至老先生日侍不去側藥餌之奉凡
供具百需至誠皆人之所不及者也雖為親應
舉亦不屑屑於得失也嘗對策極言用事者專
恣無忌狀考官欲置之上第畏其人不取
昭敬五年選才學士先生為薦首除昭格署叅
奉時祀禮廢弛先生曰太一齋醮雖非禮之禮

精裡不愆有司職耳整勅祀事無不肅敬居官
嚴正一毫非其義不為也吏僕私相戒曰毋為
不義負公也丁丑夏安夫人患痢幾危殆先生
嘗冀甜滑心愈憂苦沐浴祈天願以身代安夫
人已七十疾漸已先生侍病憂勞常吐血八月
廿四日疾卒剝歿聞者莫不大驚悼其無命以
為天道無神年四十九先生莊重詳慎一以精
思力行自飭勵為學以至誠為本或一事不盡
欲然不樂知過則必改猶恐其貳過也其居家
必嚴內外整起居好讀書有得則樂而忘寢食

常戒之曰學者不事講讀徒交結爲朋妄論是非終不失其身者鮮矣男基高旣許婚於許氏而其家喪敗有連姻家意必變改有欲言者先生曰吾旣有約於許氏不可以喪敗故相負也人愈賢之韓久庵稱之曰卽其言而觀其行蓋利害不足以動其心知隱德君子云學者稱之曰永膺先生永膺者其姓鄉邑名也初葬於果川後三十六年改葬積城之水晶山西向之麓

鄭孺人附葬

鄭孺人乙巳其家旣滅門而死繼母權氏無所

歸孺人請於姑安夫人奉養於家三十餘年權氏以天年終及先生之喪也孺人日啜溢米寒不易衣三年哭一如初喪終身以未亡人自居顯仁十二年命先生及鄭孺人旌表其間長男基稷性至孝少有學及先生歿哭極哀頭髮盡白未練而死次基高世所稱蓮峯李徵君是也昭敬中以行誼召用光海時累徵皆不起及顯仁元年大召隱逸士徵君已歿 命追爵吏曹叅判長女適別坐睦守欽次未筭先生歿啜粥哭三年而死次適生負黃有慶次適翊衛姜

渭聘徵君再娶而生四男曰惇吾倉守江都之
敗守節死之其妻金氏亦臨亂自決郡守秦國
之女也曰惇叙亂中在江都遇賊以為義不辱
溺海死曰惇實監察曰惇臨以科目進官止兵
曹正郎善乎先生一門之內孝子烈婦忠臣節
士四世八人亦前古之所未有者也又有昭格
小吏薰先生之德至割肉執喪者聞於人至行
之感人立行亦至如此銘曰
嗚呼至誠盡二可以事親可以事君可以通神
可以警俗可以教後人

德源都護府使裴公墓碣

公諱命純字遂初姓裴氏其先本星山人高麗
壁上功臣實之後裔也我 莊憲時有裴規二
子閑閨皆三貴顯見星山人物誌閑三世有仁
範靈山縣監 贈左贊成於公為三世祖 贈
貞敬夫人金氏有節婦旋門事在三綱行實大
父興立考工亞卿 贈左贊成 昭敬時名人
又有孝子旋閭父時望以蔭授宣務郎早世母
平山申氏主簿天紀之女也公生有偉姿考工
公常言曰吾兒必有後世不絕也公二十八以

武科發身丁卯之亂從 上於江都 上募衛
士伐胡公以宣傳官應募率戰士三千至安陵
擊胡斬首擄旣多陞都摠都事明年以考工佐
郎兼任籌司郎轉都摠經歷司憲監察軍器僉
正後年出爲寶城郡守有治績一年歸復入籌
司四年以不次特加折衝明年爲北道兵馬虞
候又明年爲德源都護府使丙子之亂公以營
將從南道節度使勤王時 車駕駐南漢受圍
已四十餘日而兩元帥南北節度使皆會揚根
畏胡據險自守而無進兵意公憤憤欲一決戰

必鬪而死爲主將所沮不果及 上還都諸將
各罷兵歸蒙古兵從北路還歸與我兵遇戰於
鐵嶺不利而去我躡其後公曰鐵嶺之戰我幸
而得捷賊尚強我兵飢疲釋王兵食近且便可
休兵以觀賊勢僉曰諾主將卒然變計令直趨
安邊士卒多怨之者至南山院胡數十騎有誘
我者主將督三營兵追擊之至南山驛公謂前
營將韓耆榮曰日已暮矣天雨雪賊情不可知
且留兵以觀變善也主將旣戰小利心易胡以
爲見小賊怯下令違令者斬行里餘賊果有伏

兵大起我兵擾亂者榮歎曰不用公言事至此
奈何公曰唯有一死遂力戰死之公長大鬚鬚
髯居家善於父母昆弟平生愛士好禮在軍中
一以誠信與士卒能得人之死力常曰丈夫志
在四夷死而以馬革裹尸足矣所莅皆有遺愛
追思有涕泣者德源有追思碑公生於萬曆二
十五年八月廿五日歿於崇禎十年二月十五
日年四十一夫人金氏其先義城人軍器正齊
閔之孫禮賓奉事擘之女也素以婦德稱親戚
歸心及公之喪也哀毀逾制既三年仍不食肉

齋素如持喪者十六年六十一歿合葬之墓在
星州祖谷有二男一女男尚瓊早歿尚珩前任
北道兵馬虞候二婿鄭時武鄭籛尚瓊生泰晚
歿死婿二人鄭文雅康汝楷尚珩生泰綏泰元
泰綏武科經歷婿三人金應西金錫隆鄭以周
鄭時武鄭籛皆有子女而幼惟時武長婿金昱
銘曰
志士捐軀忠臣死事百代之名萬古之義善乎
節孝之門足尚其世類

復泉姜公墓銘

復泉姜子久先生諱鶴年其先本晉陽人大司
憲籤之子副提學申湛之外孫也子久以讀小
學心經早知為學之方從賢公子德信正受大
學易乾坤文言之旨講中庸於李大淳先生萬
曆三十七年補國子生貧多病不出沈潛聖人
之學光海末國大亂時先大夫歿申夫人老矣
隱居懷川耕田以養 仁祖初召用儒學子久
特拜燕歧縣監不就明年李适叛入京城 上
南狩子久詣行在所拜鎮川縣監數月謝歸又
明年拜司禦上疏言君德 上以為至論七年

黑漢連陷兩西時子久為新寧縣監既辭朝聞
朝廷主和議還至 闕下上疏言奴不可和其
年申夫人歿既三年連拜工刑二曹佐郎不就
後年為翊衛時有 仁穆太后之喪即入謝既
卒哭歸尋拜成均司業不就後數年間再為持
平又為禮安縣監皆不就十四年復以持平陞
掌令上疏言事以為世有伯夷則必有易暴之
譏云用事者論以大不敬當無赦請置之重法
持平柳稔曰山野樸迂論法不可修撰柳穎上
疏曰其言出於愛君欲報効於上國朝二百年

來未嘗殺一言者袪斥去頽削奪官爵子久幾不免上特寬之付處恩津一年得赦還十年歿年六十三子久明經潔身言不苟行不污恥枉已而循人窮而不悶厄而不怨古之所謂尊德樂義人知之亦囂囂人不知亦囂囂者也一時清節之士多趨之者喜鼓琴以自寓以愛人利物為心推其至誠鎮川新寧久者纔半年百姓至刻石追思不已吾聞君子之世厚積而教成王父善行雲祥隱德不出好禮讓修身教人以不欺為大仁祖朝表孝子之間大憲公以

直道顯晤里李文忠公曰北海在東宮畏上不敢縱頗有譽言聞於人斯人者獨憂之此君子之先見也賢乎子久之賢其賢蓋有自也娶韓山李氏牧隱李文靖公穉之後而縣監德沂之女也生鎬顯宗世貴為關東觀察使子久死之二十二年以恩例贈至大司憲塔沈昌徵亦吾所善弘文應教沈大孚信叔之子也秀而旦歿有庶出子五人銓錫鉦鏞鎰鉦義盈章主簿二壻李明彬申尚顯明彬博川郡守鎬生世鳳世麟世龜世龜洪州牧使壻睦林儒海州牧

使昌徵生義圖壻權慤內外子孫三世四十餘
人墳墓在溫陽郡棲鳳南向之壠銘曰
直而溫簡而理方正之表邦無道如矢邦有道
如矢

李教官碣銘

公諱齊沆字而直姓李氏高麗門下侍中穉之
十一世孫韓興君德演之孫司憲府持平性源
之長子也公生於萬曆甲辰九月二日公秀而
雅有志行事父母甚得父母懽心己巳先府君
歿哭泣幾滅性癸酉選國子試一等第五人生

貢二等第二十五人進士丙子韓興君歿而公
持承重喪既三年因亂流落忠州時母崔夫人
已老奉親自守行義愈賢己卯為司饗院叅奉
謝命卽去甲申崔夫人歿旅葬其鄉之朝夕上
塚哭行者必下馬而過之嘆曰善乎哭之也孝
子之哀使人起敬云壬辰為內侍教官欲不出
士友多勸之仕乃出甲午六月七日公歿年五
十一自巳巳至甲申十五六年之間持斬衰者
二持齊衰者一居憂九年既卒喪因羸瘁痿弱
六年而死公將死謂其弟景沆曰死生命也點

檢平生幸無過惡因訓飭諸子一勉學二謹齋
祀三事叔父如事父既歿吊者皆失聲哭悼善
人之無祿其八月葬于高陽族山東南之壠令
人金氏弘文館 瞻之孫有賢婦人之德為
家克順不喜巫覡淫祀之祝公平生好施與輕
財而重義亦多內助云公歿既卒哭其長子澐
死令人以重哀晝夜哭逾年而歿八月廿一日
年四十九十月十一日祔葬同原生五男曰澐
曰浣曰涵曰泓曰澤澐毀至滅性而無子銘曰
篤於親親忠於交友積行可擬於古人其身窮
歿而又不得壽不知天道者何也

金典翰碣

公諱弘燮字重遠別號南峯姓金氏金氏貫籍
安東本新羅苗裔也高麗末有司憲掌令長書
雲觀正綏於公為七世六世正生司憲執義脛
執義生觀察使自行皆仕本朝觀察使生揚州
牧使叔演牧使生大司憲希壽大司憲生僉知
中樞魯皆以文學顯善草隸名後世僉知公以
直提學陞通政在西樞卒於公為皇考妣廣州
李氏外祖漢平君諱彥誠明 世宗 嘉靖三年

甲申公生以才學早得盛名我 恭憲王元年
丙午擢進士第一名時二十三三年戊申又以
壯元登上第聲名重於一時常侍 經幄卜年
乙卯有倭寇大發兵討之公以御史監軍嶺南
明年丙辰在湖堂 上遣中貴人試策上累千
言仍進危亡十事極言政弊詞嚴義正一時大
驚文評曰金弘度其文章與金駟孫朴闇相上
下而周博過之外戚相元衡疾而譖之又有媒
孽者竄北邊之甲山千餘里以殺公通籍才十
年官至典翰年三十四歸揚州南七十里文介

洞前夫人合葬後元衡貶公復官爵又後以少
男晬貴推 恩追爵至領議政公初娶平昌李
氏生按理瞻再娶韓山李氏生判中樞晬三娶
平山申氏無子而義絕也瞻生正字誠立郡守
正立婿李慶全朴燉慶全判書正立生振拭搗
振觀察使為伯父誠立後拭生負為監察三婿
教官李齊沆郡守羅襟承旨趙醒李慶全生厚
久阜卣袤厚正郎久翰林阜進士袤大司憲婿
趙壽益叅判振生大成大獻大智拭生大鏡搗
生大賚大錫晬生敬立義立信立敬立佐郎信

上於南漢明年 車駕還京拜司憲持平江都
敗 廟社陷沒公以法罪狀受命大臣戊寅以
繡衣廡問湖西明年以修撰出爲關西都事兵
革之後西省多事蓋朝廷選擇遣之二年復以
修撰召還乞養爲義城縣令乙酉復入爲修撰
時有姜氏賜死事公上全恩劄丁亥爲吏曹佐
郎知製 教後年陞正郎金自點方用事其子
鉞席父勢驕橫無所忌有郎僚附鉞者推薦鉞
欲引入吏曹爲郎公執不可判書趙綱叅判韓
興一皆沮之己丑爲執義吏曹判書沈諮爲時

議所忌而又有時輩之所屬望者必欲擊去乃
代指言某以私得某官某以親得某官公嘗在
吏曹備知某以某事官非私某有某事官非親
引避大臣已有上疏發此論者以爲護儻公
罷執義宋浚吉代之時自點以罪竄論罪人諸
客以公亦私相善於罪人亦在竄中左相韓興
一以吏曹時沮鉞事白 上特有減等之命付
慶沔川尋叙爲太僕正儀改副校理辛卯爲同
副承旨轉至左承旨其年加嘉善仍行左承旨
事 上寵待之殊甚壬辰自點既伏誅兩司復

論已丑得罪者公以薦引罪人爲名在列多知
此事者不從爭之不已領相鄭太和左相金瑄
亦爲上力言之公以故得免癸巳中樞公卒
既三年出爲公州以疾歸丁酉奉使如燕既復
命爲右尹尋加嘉義改左尹俄拜東都尹己亥
上登遐卒爲用事者所蔽不復顯用也後連爲
錦山富平戎申復爲左尹有繼母之喪其卒喪
之年九月十九日公卒年六十六上賜吊賻
如儀某月日葬于衿川縣水東先兆之次貞夫
人豐山金氏禮曹判書壽賢之女無子取族子

續爲後續某官生一男五女男慶運女五人皆
幼公秀而藝中樞公好簡雅父子爲知己有兄
早歿繼母第一人中樞公老而甚愛之嘗病疽
幾危殆公吮疽得痊公既貴悉以財產均諸兄
嫂諸妹而不自取曰吾雖微此不至寒餓也知
遇孝廟不隱其賢當官任職劬切不喜脂韋
尤長於剗煩莅郡皆稱治方世道大壞讒妬乘
之坎軻而終銘曰
世之偷朋黨相仇讒夫之熾良善之棄滄兮訛
兮心不媿矣

宜春君碑

公諱以興字士豪姓南氏其先本宜寧縣人我太祖開國元功忠景公在之後也忠景公之孫忠簡公智三世有禮曹叅判世健於公為曾祖祖工曹叅議應龍父羅州牧使瑜以武略顯者也我昭敬中國有大亂方居母憂起復有羅州之命其明年從統制使李舜臣與倭大戰於露梁前洋戰不出母貞敬夫人柳氏大司憲軒之曾孫而刑曹判書墳之女也明 和宗萬曆四年我 昭敬王九年公生先將軍死之時公

二十三學書去之慨然以為必報而死習騎射二十七擢武科連守邊邑十年長淵時以治理上賜表裡以賞之後體相李公恒福推薦之為富寧三年以能陞通政尋加嘉善為湖西道節度使忤用事者罷後為嶺南右節度使聲績甚多及遼左陷敗西路甚急公上疏願守一城以效死遂拜防禦使兼龜城都護府使龜城有百年碑二年移安州遼民避亂至州者以千數公立約條待以恩信有違約者罰之遼民畏之主客相安有遼民繼至者亦聞邑禁不敢犯莫不

曰賢二年擢陞資憲尋罷我 純孝王元年都
元帥張晚駐兵平壤以公爲中軍軍中事專屬
於公矣其明年副元帥造舉兵叛曰帥府諸將
惟南以興柳孝傑朴震英而已他無能爲也爲
間書至公與二人者見元帥發書罪狀功臣聲
言清君側之惡元帥問計曰造所領兵皆精銳
而降倭勁兵數萬既衆寡不敵計將安出僉曰
別將柳舜懋李慎李胤緒雖在賊中必不從賊
欲有爲而未得其當耳震英與胤緒素善得其
蒼頭過者連名爲書喻以逆順時賊已至慈山

矣胤緒已與舜懋慎及諸將李一約束夜半陰
令所領騎士三千一時潰陣馳出造亦莫追也
胤緒見元帥曰我爲將在賊中不斬賊使賊長
驅無面目報 殿下遂自刎乃死一軍大驚賊
從問道過平壤已及黃州元帥聞賊已過乃遣
公與諸將悉兵追之遇於薪橋賊出兵逆戰賊
不可當公使八號謂曰若屬皆 上之所遣諸
將背義從賊敢與 王師抗天道可畏誅及九
族禍不旋踵許銓宋豈率衆詣軍前乞死復追
至馬灘賊已破李重老軍斬八將頭送軍前以

沮衆軍皆驚恐失色公笑謂曰八將者皆吾所
熟見之皆非其面欲假人頭而給我也軍中乃
定公令軍中日賊過臨津則京城易撓必及其
未渡當決死一戰至則賊已渡而車駕亦已
南狩矣元帥令諸將曰京城已破莫與交鋒急
從西湖渡兵追及車駕公不從令曰軍法兵
有進無退乃與鄭忠信疾馳分據鞍峴朝日賊
覺官軍已先據險以衆兵攀谷緣崖蟻附仰攻
官軍少弱莫敢出氣副元帥李守一以千餘兵
來會公立於矢石擊鼓督戰大呼曰明璉中丸

墜馬兵氣稍振搏戰自卯至巳賊勢已挫將士
戰益力守一擊破頭局頭局者降倭勁兵明璉
中丸而退六軍遂潰走入城中忠信欲乘勝追
擊公曰不可既以寡克衆天也不出數日兩賊
之頭可致麾下窮寇勿追亦兵戒也迺明璉與
敗卒亡去至廣州為其下所殺降上還都都
元帥晚以白衣伏道傍頓首請罪及定功行封
公陞崇祿封宜春君功臣等各賜厯馬金帛
藏獲有差公乞歸見老母特拜延安都護府使
兼防禦使未幾召還時有西憂急以公習於邊

事而又遺愛在民拜關西節度使兼兩西巡邊使寧邊都護府使以龜城為行營自适作亂後功臣等疑忌益甚累起大獄人人自危自公出塞亦自以得死所云上之五年虜大舉伐我西鄙二日先驅已薄安州公聞事急領麾下騎士馳至則奴已渡澶水傍邑兵未集城中兵民不滿數千與防禦使金浚誓死死守而已晝啓本亦以死自言使其心斗柄馳驛遣之終日力鬪至明日奴攻城益急既力竭矣公登譙樓射矢且盡奴爭呼速降公叱曰我受命守邊一

戰決死穢也乃畏臊羆狗苟活耶遂自燒殺有二士立從不去公曰火焰宜急避對曰公為國死節為士卒安敢負公之義也皆不出城陷正月二十一日而公年五十二母柳夫人幾八十年前年自寧邊歸至家纔半年奴克我關西公知事不濟已決死審矣柳夫人聞公城陷自殺死之哭之曰家世將族父既戰而死于又戰而死其死皆不慚於古人又何恨特未亡人積歿在身 上為之賜吊賻特厚追爵左議政宜春府院君表忠臣閭恤其家錄其子孫謚曰忠壯遺

衣之塚在廣州治陰柳夫人以天年終 上特
厚賻優禮甚盛公豪邁有氣槩不事細節好施
自親戚鄰里以至踈遠貧者多倚賴焉聞其死
相吊如悲骨肉平生愛人禮士推賢讓能不媚
權貴公之陞官罷官得人之死心皆以此也公
安州時戎倭在邊者公特撫循甚善及倭從逆
叛自中相戒曰慎莫犯南爺無以報德鞍峴之
戰將士獻俘公皆不殺曰彼皆吾民脅從何可
盡殺諸虜皆感激涕泣欲死今益州百姓為之
圖畫以祭之水旱疾疫皆有禱謂之杜神祠云

貞敬夫人鄭氏我 世祖相鄭麟趾六世孫也
有五男長斗極為司宰監僉正次斗柄為水軍
統制使官最貴次斗機僉知中樞次斗樞又次
斗杓皆縣監壻三人晉陽君柳孝傑逆叛時指
名畏憚為間者也卒以平逆功受封又監役金
振聲郡守李會源于孫衆多三世四世至數丁
餘此天道之報也公死之後十年有南漢之敗
鄭公蘊丙子疏曰功臣等擅國用事猜忌才能
幾察日密籌臣不敢論兵將臣不敢治兵南以
興臨死歎之曰不得鍊一卒習一戰卒至於敗

此悲痛之辭 上以此屬反正以此屬巨國云
見危受命能守節死義立百代之名忠臣之烈
也

贈吏曹參判權公墓碣

公諱益中字景時姓權氏永嘉人大父 贈領
議政東興府院君常以至行 宣祖世特加爵
命旌表其閭皇考 贈右議政禧事 宣祖以
節儉重於時妣全州李氏郡守榮緒之女也隆
慶五年二月某日公生有仁孝性及事東興公
能服膺教訓事父母猶恐不以父母心為心莫

不曰能子之職故其生事之懼送死之哀祭祀
之嚴至老不怠公三十五 宣祖三十八年乙
巳初仕為繕工監役丙午為漢城府參軍丁未
為司憲府監察戊申為慶山縣監光海八年丙
辰以尚衣院判官為載寧郡守壬午為中樞府
經歷時公年七十二以老遂謝病己丑公七十
九趙夫人八十其年設重牢宴一門稱慶明年
庚寅公以壽考陞通政壬辰拜僉知中樞甲午
上優禮高年八十以上者有特資之 命公八
十四進嘉善丁酉拜同知中樞公以大年康寧

簡靜子孫諸婿尚主者一人公卿數人外而州
牧都護令長十餘人門戶既盛而公平生好儉
約子弟侍側必以侈服滿容為戒 孝宗十年
己亥九月四日公卒壽八十九夫人趙氏籍漢
陽縣監瑞之女也婦德克順治家以仁事舅姑
稱孝婦之行夫人長於公一年公歿不及葬而
夫人歿壽九十東興公八十二左右議政七十
九卒公又八十九可謂壽德之世也其十二月
某甲子合葬於長湍三井先兆之次有二男六
女男大有大恒大有縣令先歿大恒尚翁主為

東昌尉婿六人府使尹宗之縣監金鼎璜郡守
崔汝岬縣令李弘猷進士李維揖儒生趙公元
大有六男德行德徽德廣德養德明德潤德行
參奉德徽判官德廣德潤生負大恒無子以德
徽為後宗之生瑞監役婿四人參判張善澈領
議政沈之源監役尹澈奉事李齊泰鼎璜生華
鎮華鎰華鎔華鈺婿一人孺生金敏資汝岬生
世徽婿四人奉事李重龜承旨鄭載嵩鄭日祥
朴世萬皆士人弘猷生聖佐文佐興佐維揖婿
三人牧使李慣進士徐宗亮儒生柳檜男四人

幼公元無子內外子孫三世四世至百餘人銘
曰
仁莫善於孝友福莫厚於壽考中樞三世耆德
有自有類有積

河謙齋墓銘

丙午

先生諱弘度字重遠姓河氏晉州人前古有諱
自宗當麗之末世辭軍部尚書偽疾還鄉號木
翁終身不出生大司諫潔潔孫自清為觀察使
於先生為六世祖也大父無際父光國皆有才
不見母李氏籍江陽處士光友之女也萬曆二

十一年八月廿七日先生生不異公當兵革
之世其父母以兒奔竄道路轉客湖右以兒故
人爭客之十年始讀小學能自知力行十二三
已有求道之志十六先府君歿哭之幾滅性既
除喪從鄉先生河氏受論語通大義後鄉先生
死為之服師之服既弱冠遊學宮諸生皆敬重
之當光海時棄舉子業專以經學自勉及先夫
人歿先生已衰喪三年日羸毀病不復以人事
為禮惟應接生徒講學不倦好謙約自號謙齋
與人敦厚有禮推其孝弟鄉黨化之 仁祖世

以遺逸累召不起樂居巖泉山齋南因川石爲
臺命曰詠歸臺州牧成以性訪牧氏之術仍嘆
民散俗弊先生曰秦苛而民暴漢寬而民厚曷
嘗易民而化之也 孝宗九年召除義興縣監
終不起明年 孝宗登遐先生自以畿內之民
服齊衰三月然後從國制與士庶同服 上之
三年御史南九萬至州訪先生於安溪時朝廷
有爭禮事言者皆斥逐請聞其正先生曰爲次
長三年見於經傳况 孝廟既已君臨臣庶長
少嫡庶何可論也九萬既復 命以先生白

上先生已七十 上賜之粟又有旨尊賜之甚
厚先生上疏謝之仍陳君道九事後四年四月
廿六日先生歿年七十四先生之學本於彝倫
日用之則其操守之常踐履之方一以古人爲
法至如起居服食皆有常度嘗自言吾力行不
如古人知不善則不爲也每以禮勉人爲學必
先行而後言見世亂潔身獨行五十年非其義
也一芥不以與人一芥不以取諸人平生樂與
人爲善篤於禮俗重冠昏喪祭女子之笄國俗
所不舉而獨先生之家有此禮病末俗文弊爭

以著述爲名嘆曰古之人盡言之學者患不行
不患不知也嘗推占日月星辰之度作弦望晦
朔月閏之圖曰今曆法亂矣以此推之庶幾不
失之娶永嘉權氏軍資監直長克義之女生一
男二女男早歿有所後子泳司諫潛之孫也二
婿忠義衛李得夏士人朴英胄其年十一月十
四日葬先生于文巖寒泉上其諸弟子乞銘於
孔巖許穆曰今吾子知先生最深又能言之君
子死餘教不墜令不沒於後世吾子事也敢以
請嗟乎今吾後死而又失老德吾非斯人之爲
子之寧

銘而誰爲敢不諾銘曰

直而溫君子之文確而貞君子之亨順而成君

河司諫墓碣

公諱潛字晉伯別號台溪姓河上晉州人高麗
名臣元正公揖之後而大司諫潔之七世孫也
曾祖起崑祖瀚父公孝三世皆不顯母坡平尹
氏軍資奉事起之女皇明萬曆二十五年七月
十五日公生十年出就外傳性沈靜聰明特異
同學皆莫及也十六學既通天啓甲子我仁

祖二年進士崇禎戊辰我仁祖六年及第
第三人初授司宰監直長以親老不就丙子之
亂州父老募鄉兵赴難推公為將以父病決不
可起父戒之曰君有難人臣赴急義不可後也
行矣勉之公遂發兵至尚州忽心驚不食以在
軍不得私歸先遣次將戒曰毋後期我以親憂
在心遲數日追及期會二日計至父歿已二日
公居喪毀感人皆曰善行既除喪由騎省郎累
遷正言獻納持平公既羸瘁病又以母老謝命
即歸未嘗久於官也嘗在諫院上疏言時事凡

萬餘言疏入不下乙酉丁母憂公年已五十哭
泣寢地幾滅性服闋連為執法以疾不就因辭
職言李敬輿洪茂績沈膺李應著事勿及諸王
孫幼穉無罪事時三臣者爭建儲事忤上意
李應著論治獄皆竄北邊姜氏既賜死而諸
王孫流濟州矣疏入即適職己丑仁祖登遐
公方疾甚其七月昇疾上道又以持平有召
命既入謝又上疏言金自點專權無忌狀即還
鄉疾益甚累轉掌令司諫執義皆不就戊戌二
月廿八日公歿年六十二訃聞上以禮賻之

而凡知公者莫不惜其不大用而多出涕相吊者公性至孝寬厚愛人爲兒時有同學兒因一忿爭奪其屨割而投之公無愠色人問之則曰無此事亦不與人言聞者賢之及長有外祖母郇氏年老無子公事之如事母歿而葬當合葬於外祖而有鄉丈老居其下以爲家與葬同忌欲爭之公不與爭終以誠意感其心其丈老聽而合葬焉既顯嘗在臺省或竊其鞍從者舉其可疑者請治之公笑曰吾所失小而彼蒙惡名大矣勿問也其竊者還其鞍其忠愛感人如此

此皆君子之小節而爲教於後人多矣嗟乎才德之生不偶然而官不稱利澤不博何也天之將畜德厚積以裕其後人耶淑人鄭氏籍瑞寧副護軍霖龍之女也生七子男三人海字海容海寬女四人其婚許填金好讌姜齊泰林東遇

銘曰

寬而嚴君子之廉忠而慈君子之確

李相國墓誌銘

公諱聖求字子異系出宗室 太宗諸王子敬寧君祊之後也曾祖 贈河東君裕祖兵曹判

書

贈領議政諱希儉父吏曹判書

贈領議

政文簡公諱晬光母安東金氏義禁府都事諱
大涉之女而上洛公諱方慶之後也萬曆十二
年甲申公生十二始就外傳二十補成均上舍
後六年戊申以甲科分承文院俄選翰苑兼侍
講院說書有同僚欲薦引戚里者其氣勢盛公
斥之坐罷三年叙為典籍監察禮兵刑三曹佐
郎再入騎省為正郎連在三司於是有永昌獄
起鄭造尹訥首發 太妃各處之議時公為塔
平始貳於時議白沙李相國嘗薦引被罪者論

罷公曰罪狀未著薦人何罪用事者以為某族
連罪人公亦罷既叙又斥出伊川一年以母憂
去戊午以永平縣更置永平府公為新官蓋選
擇任之庚申李相國死謫所歸葬抱川鄉人為
之立祠時抱川為府屬邑以為相國立祠專咎
公永不許叙既去邑人立追思碑癸亥 仁祖
既反正公起為司諫首言禁捕罪人支屬寬都
門警守焚沉香山罷妓樂頒教八方人心大悅
累轉政府舍人弘文應教選將才公擢為江華
府尹一立入政院至左承旨歷禮曹叅議兵曹

下官
有闕

參知大司諫夏 穆陵崩日官以為既修改吉
日大臣疑不決公曰山陵之變出於不擇之日
修改之節何論擇日群議乃定丁卯虜連陷兩
西公以吏曹參議從 世子至全州戎辰復為
左承旨受 命試武科于吉州還上北路民瘼
政弊十六條進嘉善為湖南觀察使文簡公患
暴風 上令無待代歸至家文簡公卒服闋即
拜大司諫俄進都承旨冬特拜吏曹參判歷刑
曹參判京畿觀察使又以大司憲移副提學再
為都承旨時有追崇之議 上不待群議歸正

欲先奏請於 帝三司力爭大臣亦庭請忤旨
者多得罪適有災異 上下教求言公曰言
雖切至踐行無實則不但感天難入心亦不快
矣仍言爭論變禮上下否隔天人一理夏霜元
旱豈無其由 上感其言即令得罪者皆宥而
奏聞事亦止時吏曹判書缺大臣薦之公遂為
吏曹丙子夏以兵曹判書兼體察副使先是我
與虜許通貨開市虜既稱帝改元朝議以為當
以義絕之公曰我力弱先絕非計也時虜使至
京城惡少作亂迫逐出國冬虜大舉東創三日

言是書卷之三

十一

前驅已薄國都體府募遣精騎五百據扼險阻
崔鳴吉往虜中約成而官軍已為虜所掩敗
車駕將行江都急馳入南漢諸將相大臣皆曰
城雖險積粟少人無固志不可守也公曰急令
申景禎截賊路 車駕入保江都萬全計也明
日 上從東門早出 上忽心動乃止公又勸
上分朝 世子從京畿疾馳一日可至南陽急
入保江都以成犄角之勢國之長計無善於此
也不然江都亦難保也諸議論又定乃止公曰
事急矣今東路幸無阻 上可以間出兩南兵

力足可恃也臣當以死守之 上曰予與父兄
百官皆入於此子獨棄之安往乃令體相璽及
公聽軍警公對曰敢不竭力繼之以死虜前驅
不滿數百大軍未到急擊之以折其鋒鳴吉請
許入虜以結約誓公曰不可引賊入城示我虛
實非計也彼不以單騎入城從以百騎千騎其
可制乎鳴吉不從虜果潛師已薄城矣然後乃
辭焉虜知謀泄不入也鳴吉言於 上曰某臨
亂不動國人之所不及也虜欲入城約誓臣欲
聽之某曰此覘我也不可許也果然臣不如也

虜大軍既至山城受圍四十餘日既兵少食盡城中已急矣於是江都陷敗諸妃嬪王子貴臣家皆已被驅至城下下城之議遂決體相溼嘆之曰某可謂無愧前言者也虜既約誓而歸世子將北行大臣皆老不任行公遂為右相陞左相以行下城時大小畏約聽其約束責幣之多不可計數而莫之違也 上悔之更遣公欲改定約條至則事大乖皆反我所料者而彼知公一子在虜中賁金迫遣甚急既還詆公者以為廢事曠子公罷相未久有南警言 上欲復用

公叙為領敦寧尋改領山樞已卯北付來言王不可不入朝否者當有大責 上召諸臣問計皆曰不可違也多引前朝古事為言公曰不可城下之恥忍而至此者為有後日故也被責我多無狀至國不為國而 世子返國且無日矣不得兩全 宗社為重不幸卒有變故雖欲悔之無及矣不如早定大計也 上為之泣下稱善左右皆泣不敢復言辛巳公復入相為領議政時北使至言黃一皓前為義州陰厚內附者罪當死公極言辨之使者怒曰苟如此不得三

日作相左相由景楨慮其禍大欲無辨公曰雖
不作一日相見人無罪而見殺可無救乎使者
怒一皓終見殺人心大驚壬午夏史官薦後進
一人公惡非其人上劄論之遂削其名時議大
怒承旨洪茂績憤憤論啓後日登對茂績從之
公召下吏曰彼與我爭辨上前事體不可令
他負入侍茂績不得入又上疏言之公遂謝病
劄十上乃適相冬又有李娃事址使以娃通款
南朝繫之灣上監司具鳳瑞啓以娃供辭多言
國之陰事娃既誅將族其家公上議曰此言出

於鳳瑞傳聞而已語緒未著必得其實狀然後
處之可也群議以爲護逆以無上不道當竄
上察其無他罷黜而止公既積怒於時議客有
欲規之者公笑曰子欲我效一切辯士先合於
世主者乎作事在我成敗事在天先枉在我者
以求合在天者可乎客不復敢言公僑寓西湖
築小屋曰晚休堂日與隣里故舊逍遙自適吟
哦以自寓有西湖鄉約記癸未復叙爲領中樞
仍居江上不起一年卒年六十一訃聞上爲
之罷朝三日賜吊賻如儀自斂至葬皆用息

典甚厚墳墓在揚州治西三十里長興族葬也
李氏三世之墓皆在公通籍將四十年前時小
人亂政坎壈十年當此時持論甚嚴及至貴用
好寬大敦厚鎮物或疑其前後不同公曰小人
擅國君子當盡節君子在位不肖者當退更何
所爭性不矜不伐以持重得體為心久居本兵
所用武人自閫帥諸將以至小官烈士無一人
以私善得官者如福禪親近多宿將才武退則
私相謂曰吾輩處門下久矣亦未嘗厲聲加斥
而每進前不覺汗沾背也自遭遇 聖哲貴至

千乘相人臣之位極矣一以盛滿為戒貴而能
貧及卒衣衾不備諸大夫歸襚以成斂吊者皆
歎息賢之 上常倚任為重以忠亮許之而李
相國時白曰自中興來上之所擢用為三公者
論人物以公為首云貞敬夫人權氏籍安東舍
人昫之女生五男尚揆同揆堂揆碩揆台揆同
揆承政院承旨堂揆方為咸鏡道觀察使碩揆
戶曹佐郎台揆揚口縣監女二人婚判書李一
相韓五相五相登第未出仕而死江都之亂權
夫人與長子尚揆及其妻子婦具氏皆死節旌

表其間內外子孫三世四十餘衣冠而顯者五人同揆子正字玄紀其婿前副提學李沃堂揆子修撰玄錫碩揆婿叅議李聃命李一相婿承旨金萬均前夫人節度使尹說之女幼早世無子孫其銘曰

窮不易操磨而不磷達不改節貴而能貧進不隱賢退無怨尤嗚呼純臣之純

贈注書韓君墓碣銘

君姓韓氏諱五相字世翊宣祖平難元功清川君準之曾孫鎮峯縣監汝洞之孫同福縣監

榭之子母李氏

贈領議政綏祿之女也清川

君長男僉知中樞汝淑之嗣以從子榭為後故君以中樞公為祖君生而姿品異等自為兒時不喜戲狎端重如成人力讀書比長名譽著聞仁祖末年擢司馬壯元後五年除獻陵叅奉其年選大科未殿試有父憂既禫又母歿三年夏家大疫有妹死而其釋子病危殆君躬救視不去卒傳染乃死君自三十二連有喪被衰哭泣五年卒遘癘疫死莫不曰良善亡矣良善亡矣年三十七列其善行大者事父母愉而敬事

尊長恭而謹與朋友信而規篤於親仁博於文學好恬靜方正溫雅平生非聖人之書不讀專致力於經術葬砥平縣之白洞君死之後有承旨南九萬上疏言之追爵承政院注書兼春秋館記事官君初娶故相李聖求女丁丑江都敗守節死之無子後娶府使鄭基崇女生均君死鄭氏自刎殊而未絕及均又死終不食而死一女嫁為生負申厚軾妻又折無子李氏墓在揚州李相國族葬鄭氏合葬於白洞君功臣之世嗣絕盟府啓 上以君之從弟之子地為後

銘曰

至厚者行藝至著者名譽至感者短折至薄者嗣絕吁嗟世翊

右贊成竹泉李公墓誌銘

公諱德洞字遠伯姓李氏本韓山人族大而舊當麗末有門下侍中穉侍中五世至左議政惟清左議政長男湖南觀察使彥浩於公為曾祖公實左議政少子翊衛彥湜之曾孫而皇考護軍澳為後於堂叔父別提濡濡觀察使之嫡子故也妣驪陽閔氏肅川都護府使元宗之女嘉

死書刊集卷之三十三

靖四十五年八月乙酉公生少負奇氣倜儻不羈及知讀書折節力學好擬重無疾言透色寧原君洪公可臣遇於逆旅歎曰他日公輔之望在此人二十五選國子進士後六年冬庭試登乙科及第薦翰林二年拜正言宰相李德馨薦之後在玉堂當洪汝諄任國之用事柳丞相或龍既黜去朝士大夫有惜丞相之黜者目之曰姦黨欲並逐之陰令其客上書攻擊且盡公極言用事者相朋黨排擯異已陰譎不正尋逐出為礪山郡守一年以病去三年復召入光海

元年由應教陞同副承旨辭不拜三年既從祀五賢於太學右贊成仁弘自以南冥弟子詆毀齊退陶之學太學諸生空館力爭而四方之士上書言者日多光海既傾信仁弘皆不聽公為副提學率諸學士進諫曰上初心不緇尊賢重道之意中道改路以太學四方之士皆肆瞞誣而一人之言能盡忠於上也殿下之好惡不亦慎乎秋移左副承旨後或由祭酒或由諫院或由儀曹六為密直雖當昏亂之際能諳練治體修舉中書古事於是遼廣衙門日誅責於我

多無狀朝廷將移行省請責之公曰投鼠而忌器以藩國罪狀王人於義不可遂寢其事有佞臣使人上書言功德勸上尊號公斥去不奏每因災異言土木寃獄事光海雖不悅猶知為國無他意連上疏乞免光海不許特加嘉善大夫仍行都承旨見朝政日亂力求補外自乙卯五六年間有湖南海西之命而時西鄙多事嘗築城於黃州還陞嘉義辛酉復入中書頃年遼左之後王師敗沒而我軍帥先已陰使人約降明年帝遣監軍使者詔徵發令躡虜之後而實

幾我也於是以公賢於辭令超遷至正憲大夫癸亥光海廢時先有上變事公直禁中及兵入掖庭擾亂百僚躡匿公公服坐堂上不動有將士迫執行一武人微服負行曰此公一心徇國無私吾感其心終不言其名時上以兵衛在西階之上令肅拜公立不拜曰吾不知此事何以拜為上後有數人目之拔劍前擊之舉義將金瑩李貴叱止之瑩因私謂曰母后幽閉國大亂此反正也上定遠君之嫡嗣公宜拜之公曰諾即拜上為之起公跪曰願勿殺舊君

因泣下 上曰何爲出此言也及以事白 太妃持之令上傳國璽符公請對簾外進言曰 聖母幽閉十年 主上出萬死之計賴天之靈 宗社再安今名位未定群情疑恐乞亟從臣民之望然後 太妃乃許而 太妃既積怨於光海曰讐必斫乃已公對曰不幸姦臣敗國廢君安得無罪然既已君臨臣庶義不可奉 告 上既卽位首啓 上曰 上以大義舉大事願以勿終爲心因自言前時職在侍從之長不能匡救爲臣不忠以罪乞辭 二愈益

賢之尋出爲湖西觀察使力辭不已 上厚賜賚每以忠義許之明年李适作亂 上出幸公山及适敗死 上還京賞群臣公以判尹進階崇政大夫及十五年春 上還自南漢公以左叅贊加崇祿尋行禮曹判書啓以變亂既多教化壞敗令諸生講小學四書取士如陞補法上從之其年清人克關內誇矜有勅書朝廷表謝大臣欲稱賀得其喜心公正色曰我之於大明義不可忘今關內陷敗皇孫見俘勅到謝則猶可賀則不可 上深然之癸未復入都堂兼

判義禁明年四月沈器遠謀叛伏誅 上內鞠
罪人私屬鈞問平日往來親密罪人者辭引觀
察使朴潢司諫沈東龜 上下其事公曰有司
職當鞠治內鞠不可當封還 上旨大臣惶恐
不肯從公因登對力言其不可以故辭引者得
免死而明慎刑罰獄事無枉於是罪人收孥連
坐年不滿十五以上者除待年之律公實有力
焉五月加輔國崇祿時右相缺 上欲相之有
大臣以老沮之不果相明年拜右贊成 上嘗
不豫以元孫微弱欲擇於諸王子有一二臣忤

意 上頗不快群臣皆曰如教公徐言曰自古
變易太子臣下有以死爭之者今王言一出皆
曰如教 殿下將焉用彼臣哉元孫者宗統所
係名位已定人心屬望久矣一朝易置不可願
上平心深思往古成敗之事六月公病 上遣
醫問之後月廿九日卒壽八十訃聞 上為之
罷朝巷市以厚禮報之追 贈領議政九月葬
于高陽世葬前夫人申氏之墓在右夫人故禮
曹叅判湛之女有古賢夫人之德事舅姑能色
養三十七年卒既四十有二先葬故在右夫人

生三男一女長男昌源掌隸院司議次崇源揚
口縣監不幸早世次行源以科口顯嘗在玉堂
出為黃海都事女一人適今儀賓府都事閔汝
鎮判中樞馨男之子也後夫人迺安李氏 贈
左承旨承尹之女生一男翊衛司侍直正源又
有側室子男女五人男由源希源世源婿鄭并
源柳皖昌源生二男二女男先慶長慶先慶進
士婿主簿姜頊進士姜文粹光源生一男一女
鼎慶婿柳慎吾行源生二男三女男萬慶壽慶
皆生負婿洪箕錫權愈尚熏正源生一男二

女男雲慶婿進士睦天成女一人未嫁門鎮
生六男三女曰浚曰漳曰滌曰沈曰灑曰澂婿
正郎鄭懔鄭熙壽前命說由源希源世源鄭并
源柳皖皆有子女子孫至曾玄之世凡百餘人
公莊重有德量庶公篤厚謙退不爭至於臨大
事正大義堅嚴雖自謂責育不能奪也嘗自號
竹泉每退朝無事日以經史自娛有所著竹窓
閑話傳于家銘曰
惟寬而廉惟直而謙惟堅而嚴惟相公之烈崇
且欽

弘文館修撰李公墓碣銘

公諱行源字百初韓山郡人高麗判門下穡之後也曾祖 贈吏曹判書鵝山君潛祖 贈領議政韓安君澳父右贊成 贈領議政德洞母高靈申氏禮曹參判淇之女也 仁祖十六年六三丁六以公卿子初授 陵寢郎其年 上親試士登丙科及第補承文院副正字明年改政院注書又明年遷春坊說書尋復為注書陞成均典籍轉禮曹佐郎移兵曹陞正郎本言占事曹郎一人掌軍布出納之數末弊壇出惟所

為不問公私人亦莫恠也公意惡之避不管其事曹中竊多之尋改諫院正言移司憲持平壬午為畿省都事後再入諫院為正言選王堂為修撰贊成公卒既三年復為修撰公素不樂於世路亦不與人交驩往來不以仕宦為心 仁祖特選公既廉問圯界已丑 孝宗立又受命再出圯邊條上節鎮諸邊邑不法兵民積弊上皆用之圯邊遐遠文學絕少白 上請頒賜經史諸書以勸子弟子弟舉於鄉者令官給資遣詣京試定為令式庚寅復為修撰三上疏辭

之出爲靈巖靈巖南海上大邑去京師絕遠百
事廢壞其積弊甚者逋租虛簿至七千公力申
當省悉蠲之尋坐前守事卒就理配西海之楊
山靈巖父老至列石追思不已丁酉叙爲海西
省都事己亥爲蔚山辭不赴辛丑以成均直講
出爲通川甲辰復爲直講陞司藝公素多病亦
不樂於朝求出爲青松丁未某月日歿於官年
六十五公方廉簡通籍三十年未嘗以利害易
其操亦未嘗營立尺寸以爲私善與人感愛自
童子時見人之惡必資其有無道遇溺水死者

廢日躬救視活之贊成公聞之曰兒必受其報
蓋其天性然也家居善於父母昆弟公之仲述
初賢而無命四十五遽積疾乃死公終身痛之
未嘗對人言死事淑人河東鄭氏正言應斗之
女也生二男萬慶壽慶萬慶生負壽慶承文煇
士女婚三人洪箕錫權愈南尚熏愈承政院注
書內外子孫甚多其成人者六人萬慶子蓋生
負壽慶子湑潛箕錫婚鄭穢愈子護尚熏子迪
明其銘曰

簡而不誇直而剛事明義正吐方之人多公德

惠彌長

兗山縣監李公墓碣銘

韓山李景沆公直高麗李文靖公穡之十一世孫也曾大父 贈領議政澳大父韓興君德演父司憲府持平性源以篤行聞其銘曰忠敬篤厚直而不激孝悌之積毋崔氏別提琛之女也公自童稚時善於父母昆弟事親一以承意順適為心比長則端重謹飭以篤行誼 顯宗初選用才行公初授 光陵參表欲不出雪翁先生勸之仕累轉司饗院奉事內資寺直長叅上

為尚衣院主簿改司憲府監察有當路者怒其不悅者同列皆被其慢公恥之遂不仕尋拜知禮縣監問高年愛民禮士薄斂節用蠲逋欠五百不責於民縣有立巖川石之勝在武屹下無事則每遊賞以自娛及解歸有兼任者欲出計外以資送之公曰吾已有十日食謝不受既家居二年復為監察其年為兗山縣監縣多山地狹居民少而諸軍屯田滿邑後煩賦重民不堪公申當省罷屯田躬自薄保惠百姓出於至誠三年公歿於官年六十五吏民涕泣相吊於道

路公平生好讀書非聖賢之書不讀教子弟必
先行誼而後才藝於親戚不以其人之貴賤而
厚薄之與朋友交初持一心無所變節性恬泊
不喜紛華口不言生產貨利聞人之過但曰吾
自不爲何必言人之短所相與善非孝友良善
必文學名譽晚遊雪翁之門心相許妻宋氏其
本德恩縣人大司諫應溉之曾孫掌令錫胤之
女樂觀小學三綱行實以自律善事舅姑及公
連爲縣邑一不以廩祿之外取爲贏饒禁絕奢
侈以爲子孫戒亦婦人之賢者也有三男濟灌

淨又二女婿洪萬源陔光魯濟生繼程希程又
有一女灌生期程志程就程又有三女淨生二
男一女皆幼墓在湖西之沔川郡治北二十里
鼇谷南向之原宋氏合葬銘曰
廉介不苟好善出於性嗚呼祿仕棲棲沉抑而
不發者命耶

首陽鄭君墓銘

首陽鄭希聖有立隱德不售於世者也與我同
學於南宮斯人者敦厚忠慤行誼如古人長於
我六年我兄事之有子五人君爲次子命名曰

東稷好讀書檢身有禮知過則改見善則遷嗜
學不倦其心以爲一事不如古人非古人也必
勇往力行其學以躬行心得爲要吾字之曰文
翁 孝宗元年選國子生負後十年三十六死
嗟乎命也吾哭之曰善惡性耶窮達命耶脩短
定耶自古良善多窮窮者不長天道泐汰難謀
者理耶今君之亾尤致憾於蒼蒼者也以君清
明之氣篤厚之行不怠之學所立者正所履者
順實亶乎古人不幸窮歿而不長此命耶定耶
孺人黃氏洪州牧使原之女也有婦人媿德孀

居十二年四十四歿合葬之墓在長湍西道台
藏洞生光圖光疇光圖亦早歿女婚一人生負
李玄紀首陽之鄭自國初相乙卿大於本朝其
後有檢校漢城尹岡副知通禮門事旗於君爲
八世七世而縣令汝忠宣務郎文亨爲大王父
王父云銘曰
嗚呼有生之本其氣有清濁厚薄之殊善惡窮
達脩短不一歸化者茫然而亦有相感之氣增
使我泣涕沓如

西澗翁墓表陰記

公諱芻字千春姓李氏本慶州人慶州之李皆祖李謁平昔羅興大封五姓李其一而子孫貴大高麗世有李世楹者忠烈時登天塲及第爲密直副使其三世孫誠中逮我太祖太宗爲左政丞政丞五世有舍人瑛舍人生貴男桃源道察訪於公爲皇考母延日鄭氏生貧沃之女公好古人氣讀書潔行五十年不以困苦而易其心當光海時隱居菴親不求知於世也及仁祖世副提學李命雄薦其行誼累除恭英陵寢齋郎後爲內贍寺奉事尚瑞院直長時大

夫人已九十餘蓋爲親屈也大夫人歿不復求仕仍多病居仁川自號西澗老翁公生於萬曆己卯歿於我孝宗元年庚寅年七十二公早失先人當亂離常痛恨葬而不得盡於禮也終身不求輟煖遺命薄葬公之墓在坡州分水院上西向之原妻李氏非一李我太宗別子孝寧大君補之六世孫也生三男二女長男齊漢縣監次冲漢次之漢皆士人其二婿具鑒閔周才亦大家之世也

記言別集卷之二十三終

記言別集卷之二十三

三十四

